



**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA TEŠANJ
OPĆINSKI NAČELNIK**

Broj: 01-_____/13

Datum:

PRIJEDLOG

Na osnovu člana 13. stav 2. alineja 3. Zakona o principima lokalne samouprave u FBiH ("Službene novine FBiH" broj 49/06) i člana 14. Statuta Općine Tešanj ("Službeni glasnik Općine Tešanj" broj 11/07) Općinsko vijeće na svojoj____ sjednici održanoj ____2013. godine donosi

**ODLUKU
o usvajanju Strategije razvoja općine Tešanj 2018**

Član 1.

Ovom Odlukom usvaja se *Strategija razvoja općine Tešanj 2018* kao temeljni dokument kojim su definisani strateški pravci razvoja općine Tešanj.

Član 2.

Zadužuje se Općinski načelnik da definira prioritete i odredi nosioce za dostizanje postavljenih ciljeva na godišnjem nivou.

Pored toga, Općinski načelnik je u obavezi najmanje jednom godišnje informisati Općinsko vijeće o stepenu realizacije postavljenih ciljeva, te predlagati izmjene i dopune postavljenih ciljeva.

Član 3.

Sredstva potrebna za realizaciju postavljenih ciljeva u Strategiji razvoja općine Tešanj osiguravaju se kroz budžet općine, kroz budžete viših nivoa vlasti, vanbudžetske fondove, te kroz sredstva grantova drugih domaćih i međunarodnih institucija.

Član 4.

Stupanjem na snagu ove Odluke prestaju da važe:

- Odluka o usvajanju Strategije za dostizanje Vizije općine Tešanj ("Službeni glasnik Općine Tešanj" broj 7/06 i 6/07),
- Odluka o usvajanju Strategije razvoja općine Tešanj 2007-2015 ("Službeni glasnik Općine Tešanj" broj 11/07),
- Odluka o usvajanju Strategije podrške mladima općine Tešanj za period 2010-2015 ("Službeni glasnik Općine Tešanj" 1/10) i
- Odluka o usvajanju Strategije razvoja socijalne zaštite općine Tešanj za period 2012-2017. godina ("Službeni glasnik Općine Tešanj" broj 3/12).

Član 5.

Ova Odluka stupa na snagu osmog dana od dana objavljivanja u "Službenom glasniku Općine Tešanj".

**PREDSJEDAVAJUĆI OV
Fuad Šišić, dipl.ing.maš.**

OBRAZLOŽENJE

PRAVNI OSNOV

Pravni osnov za donošenje Odluke o usvajanju Strategije razvoja općine Tešanj 2018 sadržan je u sljedećim propisima:

- član 13. stav 2. alineja 3. Zakona o principima lokalne samouprave u FBiH ("Službene novine FBiH" broj 49/06);
- član 14. Statuta Općine Tešanj ("Službeni glasnik Općine Tešanj" broj 11/07).

RAZLOZI ZA DONOŠENJE

Na osnovu ukazane potrebe i prijedloga Općinskog načelnika, Općinsko vijeće Tešanj donijelo je Zaključak broj 01-49-2-919-2/12 od 11.04.2012. godine („Službeni glasnik Općine Tešanj“ broj 3/12) o pristupanju izradi jedinstvenog razvojnog strateškog dokumenta općine Tešanj, te Rješenje broj 01-49-2-919-4/12 od 08.05.2012. godine ("Službeni glasnik Općine Tešanj" broj 4/12) kojim je formiran radni tim za izradu strateškog dokumenta. Općina Tešanj je ranije usvojila 4 strateška dokumenta koja su određenoj fazi implementacije, a određena područja nisu adekvatno tretirana ranijim dokumentima (poput energetske efikasnosti), te su to bili neki od razloga da se izradi novi jedinstveni strateški dokument. Nakon navedenih akata Općinski načelnik je formirao pet radnih timova za izradu i to: radni tim za izradu strateške platforme, te sektore za mlade, ekonomiju, ekologiju i društveni sektor.

Strategija razvoja općine Tešanj 2018 je planski strateški dokument općine Tešanj koji treba da inicira integrisani rast i razvoj općine uzimajući u obzir društveno-ekonomski, ekološki i prostorni aspekt. Strategija je urađena u skladu sa politikama i strategijama na nivou Bosne i Hercegovine, Federacije BiH te razvojne strategije Zeničko-dobojskog kantona. Usklađena je i sa međunarodnim pravnim aktima koji se odnose na poštivanje ljudskih prava, prava djece, prava manjina, lica sa posebnim potrebama kao i drugim relevantnim preporukama međunarodnih institucija. Prilikom izrade dokumenta u obzir su uzete obaveze općine u pogledu ispunjenja određenih zakonskih obaveza i izrade odvojenih planskih i strateški dokumenata. Te obaveze i takva područja su tretirana ovim dokumentom, kao npr. Zakon o mladima i potreba da se strateški planiraju aktivnosti u tom području.

Općinsko vijeće je na 4. sjednici održanoj 31.01.2013. godine donijelo Zaključak kojim se usvaja Nacrt Odluke o usvajanju Strategije razvoja općine Tešanj 2018 i upućuje u javnu raspravu u trajanju od 45 dana.

Javna rasprava je trajala do 20.03.2013. godine, a promocija je vršena snimanjem i emitovanjem 5 radio emisija, 6 tv emisija, štampano 300 letaka, 50 plakata, 7 banera i većih plakata, obezbijedeno 720 emitiranja radio i tv spota (radio 280, televizija 440) i slanjem 240 pozivnica. Tokom javne rasprave održane su 4 tematske rasprave (mladi, ekonomija, ekologija, društveni sektor), na kojima je prisustvovalo 99 osoba.

Tokom rasprave izneseno je 102 prijedloga, sugestija, komentara i slično, a analizom javne rasprave 57 prijedloga je uzeto u razmatranje. Ostali su bili izvan teme javne rasprave, pitanja i lične konstatacije, a u prilogu dostavljamo i kompletan Izvještaj sa provedene javne rasprave.

S obzirom na sve navedeno predlažemo Općinskom vijeću da usvoji Strategiju razvoja općine Tešanj 2018 u predloženom tekstu koji je u prilogu ove odluke.

OBRAĐIVAČ

**Služba za društvene djelatnosti,
komunalne poslove i ekologiju**

Azra Muslija, dipl. pravnik

PREDLAGAČ OPĆINSKI NAČELNIK

Mr.sci. Suad Huskić, profesor

Broj: 02-49-2-140-4/13
Datum: 27.03.2013. godine